

Qimminik qitsunnillu ningarniaasarnermut toqutsisarnermullu Namminersorlutik Oqartussat nalunaarutaat

Uumasunik illersuineq pillugu Inatsisartut inatsisaanni nr. 25, 18, december 2003-meersumi § 10, § 13, imm. 2 aamma § 27, imm. 2-3 malillugit aalajangersarneqarpoq:

Kapitali 1

Atuuffia nassuaatillu

Atuuffia

§ 1. Nalunaarummi uani ilaatinneqarput qimminik qitsunnillu tigusinerit toqutsinerillu suulluunniit, apeqqutaatinnagu tamatumani suliarinnittut inuinnaanersut imaluunniit inunnit atorfimminnut atatillugu, pisinnaatinneqarnerminnut imaluunniit tassunga immikkut piginnaatinneqarnissamut akuerineqarsimasuunersut.

Imm. 2. Uumasut nakorsaasa qimminik qitsunnillu nakorsaatnik atuillutik toqutsisarnerat nalunaarummi uani ilaatinneqanngillat.

Nassuaatit

§ 2. Nalunaarummi matumani uku imatut paasineqassapput:

- 1) "Toqtsineq", qanoq iliuuseqarneq ilisimaaralugu suliassamik ingerlatsineq, taassumalu uumasup toquneranik kinguneqassasoq.
- 2) "Qimmit", qimmit tamarmik, aamma inuussutissarsiornermi qimmit, matumani qimmit qimuttut savaatillillu qimmii.
- 3) "Ningarniaaneq", uumasumik ningarniaalluni suliat tamarmik aallartinneqarneranit toqutsinissap tungaanut. Tassunga ilaatinneqassaaq uumasumik paarsineq ilaatigullu inuttassarsiuussineq.

Kapitali 2

Qimminik qitsunnillu ningarniaaneq

§ 3. Qimminik qitsunnillu tigusinermi illersorneqarsinnaasumik pineqassapput pisariaqanngitsumillu naalliutsinneqassanatik.

§ 4. Toqtsiniarneq siunertalaralugu tigusiniaaneq taamaallaat pisassaaq kommunimit imaluunniit uumasut nakorsaannit qinnuigineqarnikkut, toqtsiniarneq uumasunik illersuiniarnermik pisariaqartutut isagineqanngippat, taamaattoq imm. 2 takuu.

Imm. 2. Imm. 1-imi pineqanngillat qimmit qitsuilluunniit inuttaasa nammineq uumasuutiminnik tigusiniaanerat.

§ 5. Qimminik tigusiniarneq tassunga atugassat karsit pullatit atorlugit taamaallaat pisassaaq, pullatillu ilua minnerpaamik 120 cm × 60 cm × 70 cm.-isut angissuseqassaaq. Qitsunnik tigusiniaaneq tassunga atugassat karsit pullatit atorlugit taamaallaat pisassaaq, pullatillu ilua minnerpaamik 45 cm × 30cm × 30 cm-iusunik angissuseqassaaq.

Imm. 2. Pullatit iluisa iigai inngigissunik sineqassanngillat, aninganertaqaratik allanilluunniit uumasumut ajoqsiisinnaasumik peqassanatik.

Imm. 3. Pullatit ungerutissianik nuiuussanik peqanngikkunik naammattunik amerlassusilinnik silaannarissarfekassapput, uumasoq taamaalilluni nillarsersinnaaniassaaq ajornangitsumillu anersaartorsinnaassalluni.

§ 6. Pullatit matugaangata uumasumut innarliisinnaassanngillat.

§ 7. Pullatit ukioq tamaat atorneqarsinnaapput.

Imm. 2. Piffissami maajip aallaqqatanit 30. septemberimut pullatit akunnerit 12-kkaarlugit takusarneqartassapput.

Imm. 3. Piffissami 1. oktober 30. aprilimut pullatit akunnerit 8-kkaarlugit takusarneqartassapput.

§ 8. Uumasut tiguneqartut piaarnerpaamik chippeqarnersut, ujameqarnersut allatulluunniit ilisarnaarserneqarsimanersut misissorneqassapput piginnittumut kinaassusersiutaasinnaanersut misissorneqassallutik.

Imm. 2. Piginnittoqartoq paasineqarsinnaappat uumasoq pullammit anisinneqassaaq uumasorlu sumut aaneqarsinnaanersoq pillugu piginnittoq piaartumik ilisimatinneqassalluni.

Imm. 3. Piginnittoqartoq imm. 1 malillugu paasineqarsinnaanngippat uumasoq inuttassarsiunneqassaaq qimmit qitsuillu pillugit kommunip ileqqoreqqusaliaani malittarisassat naapertorlugit. Uumasoq toqunneqassanngilaq inuttassarsiunneqarneranit akunnerit 72-it qaangiutsinnagit.

Imm. 4. Uumasoq miluttunik piaraqarnersoq misissoqqaarneqartuaannassaaq. Uumasoq miluttunik piaraqarpat ingerlaannaq iperarneqassaaq, piaraasa tamakkerlugit tiguneqarsimanerat qulakkeerneqanngippat.

Kapitali 3

Toqtsineq igitsinerlu

§ 9. Qimmit aallaallugit toqunneqartassapput. Qitsuit gassi atorlugu imaluunniit aallaallugit toqunneqartassapput.

Imm. 2. Qimminik qitsunnillu toqtsineq ima sapinngisamik aaqqissuunneqarlunilu pissaaq uumasoq minnerpaamik anniartillugu toqunneqarnialerneranilu aamma toqunneqarnerani

annilaangatinneqassanani.

Imm. 3. Qimmimik qitsummilluunniit aallaallugu toqtsiniartup isumagissavaa uumasoq illorsorneqarsinnaasumik aalaakkerluarsimanissa imaluunniit pitussimanissa isumagissavaa, taamaalilluni pissannissaanut aarlerinaat minnerpaaffianiitinniarneqassalluni.

Imm. 4. Imm. 1-im i alajangersagaq apeqqutaatinnagu toqutseriaatsit allat atorneqarnissaat Naalakkersuisut akuersissutigisinjaavaat tamanna uumasunik illersuineq eqqarsaatigalugu illorsorneqarsinnaappat.

§ 10. Qimminik qitsunnillu aallaallugit illoqarfii lu nunaqarfii lu aamma najugaqarfii 500 meterit iluanni toqtsisoqarniarpat tamanna uumasut nakorsaannit imaluunniit Naalakkersuisut qimminik nakkutilliisutut akuersaannit taamaallaat suliarineqassaaq, taamaattoq imm. 2 aamma 4 takukkit.

Imm. 2. Allatut ajornartillugu politiit imm. 1 naapertorlugu aallaallugu toqtsisinnaapput, qimminik nakkutilliisumik imaluunniit uumasut nakorsaannik najuuttoqanngippat.

Imm. 3. Qimminik nakkutilliisut uumasullu nakorsaat imm. 1 malillugu toqtsinnginnerminni akuersissummik communalbestyrelsimut piniaqqaassapput.

Imm. 4. Kommunalbestyrelse pisuni ataasiakkaani imm. 1 naapertorlugu uumasunut nakorsaanngitsunut aamma Naalakkersuisunit akuersaallutik qimminik nakkutilliisunngitsunut akuersissuteqarsinnaavoq, makku tunngaviuppata:

- 1) uumasup nakorsaata Naalakkersuisulluunniit akuersaattut qimminik nakkutilliisup tikinnissaannut toqtsinissaq utaqqissunneqarsinnaanngippat, taamaaliornermi uumasoq pisariaqanngitsumik naalliutsinneqarluni, soorlu pilertortumik napparsimalersimappat ajoquersimappalluunniit, imaluunniit
- 2) illoqarfimm nunaqarfimmiluunniit pineqartumi uumasut nakorsaqanngippat Naalakkersuisulluunniit akuersaannik qimminut nakkutilliisoqanngippat, taakkulu piffissap naammaginartup iluani sumiiffimmut pineqartumut tikiussinnaanngippata.

Imm. 5. Imm. 4, nr 2 malillugu piffissaq naammaginartoq tassaassaaq akunnerit minnerpaamik 72-it.

§ 11. Qimmimik qitsummilluunniit toqtsiniartup toqutami illorsorneqarsinnaasumik peernissaa isumagissavaa. Ima peerneqassaaq:

- 1) nunamut qaqqamiluunniit minnerpaamik 1 meterisut ititigisumut assaanneqassaaq kingorna issumik, sioqqanik ujaraaqqanilluunniit matoorneqassalluni,
- 2) ikuallaavimmi ikuallallugu, imaluunniit
- 3) immamut kiversarlugu.

Imm. 2. Qimmit qitsuillu nappaalanertik imaluunniit nappaalasorineqarnertik tunngavigalugu toqunneqartut nappaataannik siaruaattoqannginnissaa piniarlugu toqunneqarnerisa kinguninngua ikuallanneqassapput.

Imm. 3. Imm. 2 naapertorlugu ikuallaaneq ikuallaavimmi pissaaq imaluunniit nalinginnaasumik ikuallaaviliornikkut assigisaanilluunniit ikuallaanikkut. Nalinginnaasumik ikuallaanermi uumasoq nunguillugu ikuallanneqarsimassaaq, taamaalilluni meqqui, nukii aqitsortaalu allat arsakuinnanngorlugit nungunneqassallutik.

Kapitali 4

Qitsunnik gassi atorlugu toqtsineq

§ 12. Qitsunnik gassi atorlugu toqtsiniartut Kalaallit Nunaanni Uumasunut Nakorsaqarfik Inuussutissalerinerimullu Oqartussanit tamatumunngaa akuersisummi piniassapput.

Imm. 2. Sakkut, atortorissaarutit assigisaallu qitsunnik gassimik toqtsiniarnermi atorneqartussat Kalaallit Nunaanni Uumasunut Nakorsaqarfik Inuussutissalerinerimullu Oqartussanit atorneqalinnginneranni akuerineqarsimassapput.

§ 13. Qitsunnik gassi atorlugu toqtsineq pissaaq kulilte (CO) imaluunniit kuldioxid (CO₂)atorlugit.

§ 14. Kultiltemik, tassa ipinartumik, atuinermi uumasut inissinneqarfissaat ineeraq ima ilusilersugaassaaq, aaqqissugaalluni aserfallatsaalisaalluni uumasut gassimik toqnniarneqarneranni ajoquusersinnaajunnaarsillugillu nakkutigineqarsinnaasunngortillugit.

Imm. 2. Uumasut inissiffissaannut ineeqqamut aatsaat isertinnejqassapput ineeqqami kuliltep annertussusaa minnerpaamik 1 volumenprocentimiilersimareerpat.

Imm. 3. Gassi qitsummik toqtsinermi atortussatut naatsorsuussaq motorimit aniatinneqarsinnaavoq kuliltep annertussusaa minnerpaamik 1 volumenprocentimiilersimappat uumasut ineeqqamut aatsaat isertinnejqassappata gassilu atorneqartoq imaappat:

- 1) naammattumik nillorsimappat,
- 2) naammattumik sukuluiagaappat aamma
- 3) iluaalliuutaasinnaasunik aqoqanngippat imaluunniit iluaalliuutaasinnaasunik gasseqanngippat.

Imm. 4. Gassi najuussorneqartoq siullermik ilisimajunnaartitsissutaassaaq kingornalu qularnaatsumik toqquaassalluni.

Imm. 5. Uumasut ineeqqamiitinneqassapput toqunissaasa tungaannut.

Imm. 6. Gassi motorimit aniatinneqartoq atorneqarpas, soorlu imm. 3-mi eqqaaneqartoq, uumasunik sunilluunniit toqtsinialinnginnermi atortut toqtsissutaasussat misileqqaarneqarsimassapput.

§ 15. Qitsunnik toqtsinermi kuldioxid maqitsivimmeersoq atorneqarsinnaavoq, pissutsit makku atuuppata:

- 1) uumasut ineeqqamut eqqunneqarfissaat gassimillu najuussuiffissaat ima ilusilersugaappat, aaqqissugaalluni aserfallatsaalisaalluni uumasut gassimik toqnniarneqarneranni ajoquusersinnaajunnaarsillugit nakkutigineqarsinnaatillugillu,
- 2) Ineeqqap toqtsiviusussap silaanna annerpaaffissaatigut kuldioxidimik akuitsumik isaatitsiffingeqareersumut uumasut ineeqqamut toqtsiviusussamut aatsaat isertinnejqarsinnaappata,
- 3) gassi najuussorneqartoq siullermik ilisimajunnaartitsissutaaqqaarluni kingornalu qularnaatsumik toqquaasinnaappat, kiisalu
- 4) uumasut toqunissaasa tungaannut ineeqqamiitinneqarsinnaappata.

Kapitali 5

Aallaammik qimminik qitsunnillu toqtsineq

§ 16. Qitsummik qimmiilluunniit toqtsiniartup qulakkeeqqaassavaa aallaanninnermi avatangiisit navianartorsiortinnejqannginnissaat, matumani ilangullugit aqerlut amerlasuullu maanngaannaq

aallartunik uumasunut inunnuluunniit navianartorsiortitsinnginnissaat.

§ 17. Qimminik qitsunnillu toqtsinermi qoorortooq timmiarsiulluunniit atorneqassaaq.

Imm. 2. Illuinnarsuutinik boltpistolinillu taamaallaat atuisoqarsinnaavoq Kalaallit Nunaanni Uumasunut Nakorsaqarfik Inuussutissalerinertermullu Oqartussanit ilitsersuisoqareerpat. Taamatuttaaq aallaammik taamatut ittumik pigisaqaraanni atuigaannilu Aallaasit pillugit inatsimmi aalajangersakkat naapertorlugit Kalaallit Nunaanni Politimesterimiit akuersissut pigineqartariaqarpoq.

Imm. 3. Boltpistol atorneqassappat patronia ima annertutigissaq, tamanna qimminik qitsunnillu toqtsinissamut uumasut illorsorneqarnerat eqqarsaatigalugu tulluuttuussalluni.

Imm. 4. Imm. 2-mi aalajangersakkat apeqqutaatinngagit politiini illorsornissamullu suliaqartuni sulisut sulinermennut atatillugu illuinnarsuutertik atorlugu qimminik qitsunnillu illorsorneqarsinnaasumik aalaakkerneqarsimasunik toqtsisinnaapput.

§ 18. Qarasaanut toqqaannartumik igittoqassaaq, taamaattoq imm. 2 takuuk

Imm. 2. Uumasoq perlerorsorineqarpat uummataatigut aallaaneqassaaq.

Imm. 3. Toqtsisoqassanngilaq uumasup toqunniakkap ungasissusaa 15 meterinik ungasinneruppat.

Imm. 4. Imm. 3 apeqqutaatinngagu qimmit pituussaarnikut iluatsinngitsumik tiguniarneqartaraluartut qoorortooq qinngutitalik atorlugu 50 meterit tikillugit ungasitsigisoq aallaallugu toqunneqarsinnaavoq.

Imm. 5. Qimmeq pituussaarnikoq imm. 4 malillugu qarasaatigut aallaallugu toqunneqarsinnaanngippat sapinngisamik uummataatigut aallaaniarneqassaaq.

Kapitali 6

Qoorortooq atorlugu toqtsineq

§ 19. Qimmit qitsuillu toqunniarneqarsinnaapput qoorortooq .22 magnum annerluunniit atorlugit.

Imm. 2. Aqerlut inngigissut kanngussammik saviminernilluunniit puullit atoqquaanngillat.

Kapitali 7

Timmiarsiut atorlugu toqtsineq

§ 20. Timmiarsiutit kaliber 20-it annerilluunniit qimminik qitsunnillu toqtsinermi taamaallaat atoqquaapput.

Imm. 2. Amerlasuut savimernit toqtsinermi atorneqarpata diameteriat minnerpaamik 3,75 mm-iussapput.

Kapitali 8

Pineqaatissiinissamut atuutilersitsinissamullu aalajangersakkat.

§ 21. §§-inik 3-8, § 9, imm.1-3, § 10, imm.1-2, aamma §§-inik 11-20 unioqqutitsinerit akiliisitsinermik pineqaatissiissutaasinnaapput.

Imm. 2. Inatsisitigut pisussaatitaasoq Kalaallit Nunaanni Pinerluttulerinermut inatsimmi malittarisassat malillugit akiliisussanngortitaasinnaavoq.

Imm. 3. Imm. 1-imik aalajangersakkanik peqqarniitsumik utikattumilluunniit unioqqutitsinerit sunilluunniit uumasuuteqarsinnaanermik qaqugumulluunniit imaluunniit piffissami killilimmi inerteqqusiisoqarsinnaavoq.

Imm. 4. Nalunaarut manna malillugu akiliisitsinermi pineqaatissiissutit Nunatta karsianut nakkartinneqassapput.

§ 22. Nalunaarut atuutilerpoq ulloq 1. februaari 2018-imi.

Namminersorlutik Oqartussat, ulloq 28. decembari 2017

Karl Kristian Kruse

/

Jørgen I. Olsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviit

Naalakkersuisut